

इवनिंग डोगरी न्यूज़ बुलेटिन

समे .1815

एह आकाशवाणी जम्मू ऐ, संजा खबरें च तुंदा सुआगत, पैहले खास-खास खबरें कन्नै में जगमोहन शर्मा ।

<><><><><><>

Headlines

- 1 जम्मू जिला विकास कमीशनर सचिन कुमार वैश्य होरें 4 जून गी होने आले लोकसभा चुनावें दे वोटें दी गिनतरी लेई तैआरिएं दा जायजा लैने लेई बैठक सद्दी ।
- 2 औंदी श्री अमरनाथ जी दी यात्रा लेई नां दर्ज कराने लेई इक रजिस्ट्रेशन काउंटर जम्मू कश्मीर दी मेन ब्रांच उधमपुर च शुरू कीता गेआ ।
- 3 जम्मू प्रांतै दे उधमपुर ते रियासर जिले दे केई जंगली इलाकें च अग्ग लगी गेदी ऐ, अग्गे पर काबू पाने लेई जतन तेज ।
- 4 उत्तर भारत दे केई होरने इलाकें आला लेखा समूलचे जम्मू प्रांतै च बी अग्ग बराह्दी गर्मी कोला राहत थोने दी फिलहाल कोई मेद नेई ऐ । जम्मू च अज्ज बद्धोबद्ध तापमान 44.8 डिग्री सैल्सियस रिकार्ड कीता गेआ ।

<><><><><><>

ते हून खबरें दी तफसील कन्नै श्रुति खजूरिया ।

<><><><><><>

Election Counting(byte)

लोकसभा चुनावं तैहत पाए गेदे वोटें दी गिनतरी आला कम्म 4 जून गी होग। इस सरबंघै च डीसी दपतर जम्मू च इक बैठक लग्गी। इस बैठक दी अध्यक्षता डीसी जम्मू सचिन कुमार वैश्य होरें कीती। बैठक च पुलस, ट्रैफिक, सुरक्षा, सेहत, सीआईडी, बिजली मैहकमे नै हिस्सा लैता। इस दरान 4 जून गी वोटें दी गिनतरी आले कम्मं गी सुचारू ते रमानदारी आले ढंगै सिर करोआने लेई इंतजामें पर चर्चा होई। आकाशवाणी जम्मू कन्नै गल्ल करदे होई डीसी जम्मू होरें आखेआ जे भारतीय चुनावं आयोग दी हिदायतें मूजब व्यापक इंतजाम कीते जा'रदे न तां जे मतगणना आला कम्म रमानदारी कन्नै होई सकै। उनें आखेआ.....बाईट

<><><><><><>

Campaigning

लोकसभा चुनावं 2024 दे 7में ते खीरले गेड़ लेई चुनावं प्रचार हुन अपने खीरी चरणै च ऐ ते कल संजा प्रचार दा एह सिलसिला खत्म होई जाग। इस गेड़ तैहत पैहली जून गी 7 राज्यें ते इक केन्द्र शासत प्रदेश च फैली दिएं कुल 57 लोकसभा सीटें लेई वोट पोआए जांगन जिंदे राएं चुनावं मैदानें च खड़ोते दे 904 मेदवारें दे चुनावी भविक्ख दा फैसला होग। सब्बै सियासी दल अपने प्रचार दरान मते शा मते मतदाताएं गी अपने पक्खे च करने लेई अपनी पूरी टिल्ल जा करदे न। बीजेपी दे वरिष्ठ नेता ते प्रधानमंत्री नरेन्द्र मोदी होरें पच्छम बंगाल दे मथुरापुर च इक रैली गी संबोधत करदे होई आखेआ जे अज्ज दुनिया दा हर मुख्ख भारत आली बक्खी बड़े आदर मान कन्नै दिक्खदा ऐ भाएं ओ अमरीका होए, जपान जां यूरोप दा कोई मुख्ख। उनें आखेआ जे भारत दा रूतबा ते रसूख जेहड़ा दुनिया च बधेआ ऐ, ओ इस करियै की जे भारत दे लोकें बीजेपी पर अपना भरोसा जताया ते बीजेपी दी अगुवाई आली सरकार नै भारत दी दुनिया भरै च इक नमीं ते बक्खरी पंछान बनाई। उनें एनडीए सरकार दिएं पिछले 10एं ब'रे दिएं उपलब्धिएं गी गिनांदे होई आखेआ जे केन्द्र सरकार नै अजें तोड़ी 4 करोड़ बेघर लोकें गी पक्का मकान, 12 करोड़ कोला मते घरें तगर नलके राएं पानी ते हर ग्रां तोड़ी बिजली पजाई ऐ।

<><><><><><>

Amarnath Yatra(byte)

श्री अमरनाथ जी दी इस ब'रे दी यात्रा लेई पंजीकरण जम्मू कश्मीर बैंक दी मुख्खा शाखा उधमपुर च शुरू होई गोआ ऐ। इस लेई खास इंतजाम कीते गेदे न। एहदे आस्तै खास काउंटर खडेरेआ

गेदा ऐ। पंजीकरण लेई आधार कार्ड लाजमी रखेआ गेदा ऐ। जम्मू कश्मीर बैंक उधमपुर मूजब 651 लोकें अजें तगर श्री अमरनाथ यात्रा अजें तगर श्री अमरनाथ यात्रा लेई इक काउंटर थमां पंजीकरण करोओया ऐ। आकाशवाणी कन्नै गल्ल करदे होई श्रद्धालु नै गलाया.....बाईट

<><><><><><>

Samba(byte)

केन्द्री यूनिवर्सिटी जम्मू नै असरो सेंटर जम्मू थमां अपने रेडिया सोंदे दी कामयाब शुरूआत दी घोषणा कीती ऐ। एह शुरूआत सेंअल यूनिवर्सिटी इसरो ते राष्ट्रीय रीमोट सेसिंग बश्कार होए दे समझौते तैह्त कीती गई ऐ। रेडियो सोंदे पर्यावरण सरबंधी डेटा किट्ठा करने च इक बड़ा महत्वपूर्ण जरिया ते साधन साबत होग। एहदा मकसद वातावरण सरबंधी परिस्थितिएं, जलवायु परिवर्तन बारे महत्वपूर्ण जानकारी ते एहदे बारे समझ हासल करना ऐ। इस बारे गल्ल करदे होई वाइस चांसलर संजीव जैन होरें आखेआ.....बाईट

<><><><><><>

Poonch Smart class

पहाड़ी होस्टल पुंछ च बच्चें लेई पढ़ाई-लिखाई गी होर बेहतर करने दे जतन तैह्त स्मार्ट क्लासरूम बनाया गेआ ऐ। एह विद्यार्थिं दी बड़े लम्मे चिरे थमां बकाया पेदी मंग ही। इस गैई कन्नै खित्ते च बेहतर शिक्षा सहूलतां उपलब्ध करोआने च मदद थहोग ते विद्यार्थिं गी पढ़ने लेई होर बेहतर मौके उपलब्ध होंगन। इस स्मार्ट क्लासरूम च डिजीटल बोर्ड, इंटरनेट ते होर दुइयां चीजां उपलब्ध न जेहदे कन्नै बच्चें गी पढ़ाई च सौख होग। पहाड़ी होस्टल दे बच्चे इस नमीं सुविधा लेई खुशी ते संदोख जाहर कीता ऐ।

<><><><><><>

Nawaz Sharief

पाकिस्तान दे साबका प्रधानमंत्री नवाज शरीफ होरें स्वीकारेआ ऐ जे इस्लामाबाद नै 1999 च भारत कन्नै इक समझौते दी खिलाफवर्जी कीती ही। पाकिस्तान मुस्लिम लीग दी जनरल कौंसल दी बैठक च उनें एह खुलासा कीता। बैठक दौरान शरीफ होरें दावा कीता जे उनें 28 मई 1998 गी परमाणु परीक्षण कीता हा। जवाब च उसले दे भारतीय प्रधानमंत्री अटल बिहारी बाजपेयी होरें लाहौर दा

दौरा कीता ते 21 फरवरी 1999 च लाहौर घोषणा पत्र पर दस्तखत कीते। समझौते दा मकसद भारत ते पाकिस्तान बश्कार शांति गी बढावा देना हा। शरीफ होरें आखेआ जे दस्तखत दे फौरन मगरा पाकिस्तानी सैनिकें जम्मू-कश्मीर दे कारगिल जिले च घुसपैठ कीती जेदे कन्नै कारगिल युद्ध होआ।

<><><><><><>

हुन बाकी खबरें कन्नै प्रोमिला जम्वाल।

<><><><><><>

Heat Wave

उत्तर भारत दे केई होरने इलाकें आला लेखा समूलचे जम्मू प्रांतै च बी अग्ग बराहदी गर्मी कोला राहत थोने दी फिलहाल कोई मेद नेई ऐ। जम्मू च अज्ज बद्धोबद्ध तापमान 44.8 डिग्री सैल्सियस रिकार्ड कीता गेआ। जम्मू खित्ते च गर्मी दा प्रकोप बरोबर जारी ऐ। कल कठुआ च बद्धोबद्ध तापमान 47 डिग्री सैल्सियस थमां उप्पर हा ते सांबा च तापमान 45 डिग्री सैल्सियस दर्ज कीता गेआ ते जम्मू शैहर च तापमान 43.6 डिग्री सैल्सियस दर्ज कीता गेआ। मौसम विभाग नै पेशगोई कीती ऐ जे औने आले हफते च गर्म ते ,खुश्क मौसम थमां निजाद थोने दे कोइ आसार नेई हैन। उआं 30 थमां 31 मई ते पैहली जून ते 2 जून गी कश्मीर घाटी दे मते सारे हिस्सें ते जम्मू खित्ते दे पहाड़ी इलाकें च गर्मी थमां राहत थोइ सकदी ऐ।

<><><><><><>

Forest Fire

उधमपुर जिले दे जंगली इलाकें च अग्ग लगने करी जंगली संसाधनें ते वन्य जीवन दा बडत्रा मता नुक्सान होआ ऐ। जंगलात मैहकमे ते मकामी लोकें आस्सेआ इस अग्ग गी काबू च करने लेई कीते गेदे जतन अज्ज तगर सफल नेइं रेह हैन। अग्ग पर काबू पाने लेई भारतीय वायु सेना दे हैलाकाप्टरें दी मंग कीती गेई ऐ। एह अग्ग दासो जंगली इलाकें च लग्गी ऐ जेहड़ा उधमपुर ते जम्मू जिले कश्मार ऐ। एह अग्ग 5 थमां 6 मरबा किलोमीटर इलाकें च फैली दी ऐ। कठुआ ते राजोरी जिले च बी मंगलवारें अग्ग लगी जेहदे करी जंगली संपत्ति दा बड़ा मता नुक्सान होआ। जंगलात मैहकमे ते मकामी लोकें दे जतनें करी अग्गे पर केई घेंटे मगरा काबू पाया गेआ।



National Highway

जम्मू श्रीनगर राष्ट्रीय जरनैली शिड़कै पर जित्थें तुरत ते पैहल दी बिनाह नी मरम्मत ते रख-रखाव दी बड़ी मती लोड़ ऐ तां जे सामरिक लिहाज कन्नै इस महत्वपूर्ण शिड़कै पर गडिडएं दी आओजाई दी बवस्था बनी दी रवै, टकोहदा करियै औंदी श्री अमरनाथ जी दी यात्रा गी ध्यानै च रखदे होई इनें महत्वपूर्ण थाहरें दी सुरक्षा ते सुविधा बवस्था बक्खी चेचा ध्यान दित्ता जा8रदा ऐ। जम्मू च लग्गी दी इक उच्ची सतह दी जायजा बैठक च उनें थाहरें बारे चेचे तौरा पर चर्चा कीती गई जित्थें मती बारी ट्रैफिक जाम कारण गडिडएं दी आओजाई च बिघन पौंदा ऐ। रामबन दे डिप्टी कमीशनर बसीर उल हक चौधरी होरें आखेआ जे जायजा टीम च मकामी पुलस, डीआईजी ट्रैफिक पुलस ते होर दुए बड्डे अधिकारी मजूद हे, जिंदे च जरनैली शिड़कें सरबंधी भारती प्राधिकरण NHAI दे अफसर बी शामिल हे। टीम नै बनिहाल कस्बे च ट्रैफिक दे बंदोबस्तें दा बी जायजा लैता। 52 दिनें दी श्री अमरनाथें दी यात्रा ऐकतह 29 जून गी शुरू होइयै 19 अगस्त रक्खड़ पुन्नेआ आले रोज सम्पन्न होइ जाग।



Samba Agriculture Officer(byte)

सांबा दे जिला राई-बाई अधिकारी मदन गोपाल सिंह ते उंदी टीम नै रामगढ़ दे बन्ने आले इलाके दा दौरा कीता ते करसानें कन्नै मलाटी करियै उनेंगी फसल दी बाड्डी मगरा खेत्तर च बचे दी नडी गी फुकने कन्नै नुक्सान होंदा ऐ। उनें करसानें गी आखेआ जे जेकर इसी फुकने दे बजाए एहदे पर हल चलाई जा ते इसी खेत्तर च गै मलाई दित्ता जा तां एह जैविक हैल बनी जंदा ऐ ते एहदे कन्नै पर्यावरण गी बी नुक्सान नेई पुजदा। साढ़े संवाददाता कन्नै गल्ल करदे होई राई-बाई अफसर मदन गोपाल सिंह होरें आखेआ.....बाईट



Health Secretary

केन्द्री सेहत सचिव अर्पूव चन्द्रा होरें आखेआ ऐ जे भारत विश्व सेहत संगठन WHO दे सैहयोग कन्नै सब्बने लेई बेह्तरनीन ते मयारी इलाज मुआलजे दियां सुविधां ते चिकित्सा उत्पादें, दी तुरत पुज्ज ते दस्तेयाबी जकीनी बनाने लेई वचनबद्ध ऐ। जेनेवा च 77मीं विश्व सेहत सभा गी संबोधत करदे होई अर्पूव चन्द्रा होरें आखेआ जे प्रधानमंत्री जन अरोग्य योजना, दुनिया दी सब्बने शा बड्डी सेहत स्कीम ऐ जेह्डी हर बरे 30 करोड़ लाभार्थिं गी 6 जहार अमरीकी डॉलर दा सेहत लाह पुज्जा करदी ऐ। उनें आखेआ जे भारत नै इक लक्ख 60 जहार कोला मते आरोग्य मंदरें दा संचालन करियै सेहत सेवां गी बढ़ावा देने लेई आयुष्माण भारत लाईव लांग ऐ। उनें आखेआ जे पिछले दहाके च मातृ-मृत्यु दर ते शिशु मृत्यु दर च खरी मती कमी दर्ज कीती गई ऐ। उनें आखेआ जे भारत कुल संसारी सतह पर सैहयोग लेई डिजीटल सार्वजनिक उत्पादें च दुनिया भरै च इक बक्खरी पंछान बना करदा ऐ।

<><><><><><>

Read: Jagmohan Sharma & Shruti Khajuria

D.E.O. : Mukesh Gupta

Skilled : Tarsem

Editor : Mohd.Mustkeem Baig

